

四庫全書

史部

欽定四庫全書

欽定續通志卷七十二

后妃傳二

唐二

睿宗肅明劉皇后

昭成竇皇后

玄宗廢后王氏

貞順武皇后

元獻楊皇后

楊貴妃

肅宗廢后庶人張氏

章敬吳皇后

韋妃

代宗貞懿獨孤皇后

睿貞沈皇后

崔妃

德宗昭德王皇后

韋賢妃

順宗莊憲王皇后

憲宗懿安郭皇后

孝明鄭皇后

穆宗恭僖王皇后

貞獻蕭皇后

宣懿韋皇后

尚宮宋若昭

敬宗郭貴妃

武宗王賢妃

睿宗肅明順聖劉皇后祖德威自有傳儀鳳中帝在藩
納為孺人俄為妃生寧王壽昌代國二公主帝即位為
皇后會帝降號皇嗣復為妃長壽二年為戶婢誣與竇
德妃挾蠱道祝詛武后並殺之景雲元年追諡肅明皇
后

睿宗昭成順聖竇皇后曾祖抗父孝謹自有傳后婉淑
尤循禮則帝為相王納為孺人即位進德妃生玄宗及
金仙玉真二公主與肅明同追諡肅明日惠陵后曰靖

陵立別廟曰儀坤以享之帝崩追稱皇太后與肅橋陵
后以子貴故先祔睿宗室肅明以開元二十年乃得祔
廟天寶八載制詔自太穆而下六皇后並增上順聖二
諡云

玄宗廢后王氏同州下邳人梁冀州刺史神念之裔孫
帝為臨淄王聘為妃將清內難預大計先天元年立為
皇后久無子而武妃稍有寵后不平顯詆之帝密欲廢
后以語姜皎皎漏言即死后兄守一懼為求厭勝浮屠

明悟教祭北斗取霹靂木刻天地及帝諱合佩之曰後
有子與則天比開元十二年事覺帝自臨劾有狀乃廢
為庶人賜守一死始后以愛弛不自安承間泣曰陛下
獨不念阿忠脫紫半臂易斗麵為生日湯餅耶帝憫然
動容阿忠后呼其父仁皎云由是久乃廢當時王諲作
翠羽帳賦諷帝未幾卒以一品禮葬後宮思慕之帝亦
悔寶應元年追復后號

貞順武皇后恒安王攸止女幼入宮帝即位寢得幸時

王皇后廢故進冊惠妃其禮秩比皇后可帝在潞趙麗妃以倡幸有容止善歌舞開元初父兄皆美官及妃進麗妃恩亦弛以十四年卒諡曰和生太子瑛而皇甫德儀生鄂王劉才人生光王皆藩邸之舊後受薄而妃乃專寵封所生母楊鄭國夫人弟忠國子祭酒信秘書監將遂立為皇后御史潘好禮上疏言禮父母讐不共戴天春秋子不復讐不子也陛下欲以武氏為后何以見天下士妃再從叔三思從父延秀皆干紀亂常天下共

疾匹夫匹婦尚相擇况天子乎今人間咸言右丞相張
說欲取立后功圖復相今太子非惠妃所生而妃有子
若一儷宸極則儲位將不安遂不果立妃生二王一主
皆不育及生壽王帝命寧王養之外邸又生盛王咸宜
太華二公主後李林甫以壽王母愛希妃意陷太子鄂
光二王皆廢死會妃薨年四十餘贈皇后及謚葬敬陵
元獻楊皇后華州華陰人曾祖士達為隋納言天授中
以武后母黨追封士達為鄭王父知慶太尉帝在東宮

后以景雲初入宮為良媛時太平公主忌帝而宮中左右持兩端纖悉必聞媛方娠帝不自安密語侍講張說曰用事者不欲吾多子奈何命說挾劑以入帝於曲室自煮之夢若有介而戈者環鼎三而三煮盡覆以告說說曰天命也乃止生男是為肅宗帝即位為貴嬪初肅宗生卜云不宜養乃命王皇后舉之后撫肅宗如所生後又生寧親公主乃薨肅宗即位至德二載太上皇自蜀詔有司其議尊稱遂上冊諡寶應未祔泰陵

楊貴妃隋梁郡通守汪四世孫徙籍蒲州遂為永樂人

幼養叔父家始為壽王妃開元二十五年武惠妃薨

按吳

顏糾繆載武惠妃薨於二十五年而楊貴妃傳誤作二十四年考新舊書紀及資治通鑑皆作二十五年今據

改

後宮無當帝意者或言妃姿質天挺宜充掖廷遂召

納禁中異之即為自出妃意者丐籍女官號太真更為

壽王聘韋昭訓女而太真得幸善歌舞遽曉音律且知

算警穎迎意輒悟帝太悅遂專房宴宮中號娘子儀體

與皇后等天寶初進冊貴妃追贈父玄琰太尉齊國公

擢叔玄珪光祿卿宗兄鉅鴻臚卿錡侍御史尚太華公
主主惠妃所生最見寵遇而釗亦寔顯釗國忠也三姊
皆美幼封韓號秦三國為夫人出入宮掖聲焰震天下
臺省州縣奉請託奔走期會過詔敕四方獻餉結納門
若市然建平信成二公主以與妃家忤至追內封物駙
馬都尉獨孤明失官他日妃以譴還鉅第北中仄帝尚
不御食答怒左右高力士欲驗帝意乃白以殿中供帳
司農酒餼百餘車送妃所帝即以御膳分賜力士知帝

旨是夕請召妃還下鑰安興坊門馳入妃見帝伏地謝
帝釋然撫慰良渥明日諸姨上食樂作驟賜左右不可
貲由是愈見寵賜諸姨錢歲百萬為脂粉費銘以上柱
國門列戟與錡國忠諸姨五家第舍聯亘擬憲宮禁率
一堂費緡千萬見他第有勝者輒壞復造務以壞侈相
誇詡帝所得奇珍及貢獻分賜之使者相銜於道五家
如一妃每從遊幸乘馬則力士授轡策凡充錦繡官及
冶琢金玉者大抵千人奉須索奇服秘玩變化若神四

方爭為怪珍入貢動駭耳目於是嶺南節度使張九章
廣陵長史王翼以所獻最進九章銀青階擢翼戶部侍
郎妃嗜荔枝乃置騎傳送味未變已至京師天寶九載
妃復得譴還外第國忠謀於吉溫溫因見帝曰婦人過
忤當死然何惜宮中一席廣為鈇鑕地更使外辱乎帝
感動輟食詔中人張韜光賜之妃因韜光謝帝曰妾有
罪當萬誅然膚髮外皆帝所賜今且死無以報引刀斷
一縷髮奏之曰以此留訣帝見駭惋遽召入禮遇如初

因又幸秦國及國忠第賜兩家鉅萬國忠遙領劍南十載正月望夜妃家與廣寧主僮騎爭闌門鞭挺護競主墮馬僅得去主見帝泣乃詔殺楊氏奴貶駙馬都尉程昌裔

公主傳作程昌胤

官國忠輔政其息肫尚萬春公主暄尚

延和郡主弟鑑尚承榮郡主又詔為玄琰立家廟帝自書其碑銘秦國早死故韓號與國忠貴最久而號國素與國忠亂頗為人知不恥也每入謁並轡道中從監侍姆百餘騎炬密如晝初安祿山有邊功帝寵之詔與諸

姨約為兄弟而祿山母事妃來朝必宴餞結歡祿山反以誅國忠為名且指言妃及諸姨罪帝欲以皇太子撫軍因禪位諸楊大懼哭於庭國忠入白妃妃銜塊請死帝意沮乃止及西幸至馬嵬陳玄禮等以天下計誅國忠已死軍不解帝遣力士問故曰禍本尚在帝不得已與妃訣引而去繼路祠下裹尸以紫茵瘞道側年三十八帝至自蜀道過其所使祭且詔改葬禮部侍郎李揆曰龍武將士以國忠負上速亂為天下殺之今葬妃恐

反仄自疑帝乃止密遣中使具棺槨他葬焉啟瘞故香囊猶在中人以獻帝視之悽感流涕命工貌妃於別殿朝夕往必為哽噎馬嵬之難號國與國忠妻裴柔等奔陳倉縣令率吏追之意以為賊棄馬走林號國先殺其二子柔曰娘子為我盡命即并其女刺殺之乃自剄不殊吏載置於獄問曰國家乎賊乎吏曰互有之乃死瘞陳倉東郭外

肅宗廢后庶人張氏

舊書作肅宗張皇后今從新書

鄧州向城人家徙

新豐

舊書作南陽西鄂人後徙昭應按唐地理志鄧州南陽郡其屬有向城漢西鄂縣地是舊書誤沿漢

名也至首新豐人昭應在天寶七載新舊書不嫌互異

祖母寶昭成皇后女弟也

玄宗幼失昭成母視姨鞠愛篤備帝即位封鄧國夫人

親寵無比五息子曰去惑去疑去奢去逸去盈皆顯官

去盈

公主傳作去奢

尚常芬公主去逸生后肅宗為太子時納

韋元珪女為妃后為良娣既以事絕韋妃良娣得專侍

良娣慧中而辯能迎意傳合玄宗西幸娣與太子從度

渭民鄣道乞留復長安太子不聽中人李輔國密啟娣

又贊其謀遂定計北趨靈武時軍衛單寡夕次娣必寢
前太子曰暮夜可虞且捍賊非婦人事對曰事若倉卒
妾自當之殿下可徐為計駐靈武產子三日起縫戰士
衣太子敕止對曰今豈自養時耶謹按通鑑輯覽

御批良婦新產為戰士縫衣猶婦人固寵取憐常態至欲居前
禦寇自託於馮婕妤之當熊肅宗為巧言所惑不明甚矣先
為小忠小信以成其大不忠不信婦寺類然他日
竊柄宮闈幾蹈武韋前轍皆此一念階之禍也乾元初冊

拜淑妃贈其父尚書左僕射弟清潛皆尚郡主遂立為
皇后稍預政事與李輔國相助多以私謁撓權親蠶苑

中羣命婦相禮儀物甚盛二年羣臣上帝尊號后亦諷羣臣尊已號翊聖帝問李揆揆爭不可會月蝕帝以咎在後宮乃止又與輔國謀徙上皇西內端午日帝召見山人李唐帝方擁幼女顧唐曰我念之無怪也唐曰太上皇今日亦當念陛下帝泣然涕下而內制於后卒不敢謁西宮帝不豫后自鍼血寫佛書以示誠初建寧王倓數短后於帝上皇在蜀以七寶鞍賜后而李泌請分以賞戰士倓助泌請故后怨卒被譖死由是太子深畏

事后謹甚后猶欲危之然以子伋早世而侗幼故太子得無患寶應元年帝大漸后與內官朱輝光等謀立越王係而李輔國程元振以兵衛太子幽后別殿代宗已立羣臣白帝請廢為庶人清潛與舅竇履信皆流放支黨伏誅

章敬吳皇后濮州濮陽人父令珪以郾丞坐事死故后幼入掖庭開元中玄宗幸忠王邸顧王服御蕭然左右無嬪侍帝愀然謂高力士曰兒居處乃爾詔選京兆良

家子五人娛侍太子力士曰京兆料擇人得以籍口不如取掖庭衣冠子可乎詔可得三人而后在中因蒙幸明年生代宗為嫡皇孫后性謙柔太子禮之甚渥二十

八年薨代宗即位羣臣請以后祔肅宗廟乃追尊為皇

后上諡合葬建陵

按新書原傳載肅宗在東宮宰相李林甫陰謀不測太子內憂鬢髮班禿

玄宗見不悅因幸其宮顧廷宇不汎掃樂器塵蠹左右無嬪侍帝愀然詔選掖廷衣冠子入侍后在選中因蒙

幸生代宗又載代宗生三曰帝臨澡之負姆更取他宮兒以進吳縝糾謬云代宗之生以帝紀推之當在開元

十五年時太子瑛尚在東宮李林甫未為相至二十六年肅宗為太子則代宗已年十二矣且肅宗既為太子

況掃廷宇整飾樂器宜各有典司豈有乘輿方至而恬然不加整治者至負姆易兒雖人臣之家不宜有是況至尊之前則原傳固誕謾不足信也今依舊書重加訂正事涉荒誕者悉刪之

韋妃父元珪兗州都督肅宗為忠王時納為孺人及升儲位為太子妃生兗王僖綽王佺永和公主永穆公主天寶中宰相李林甫不利於太子妃兄堅為刑部尚書林甫羅織起柳勣之獄堅連坐得罪兄弟並賜死太子懼上表自理言與妃情義不睦請離婚玄宗慰撫之聽離妃遂削髮被尼服居禁中佛舍西京失守妃亦陷賊

至德二載薨於京城

按新書不為韋妃立傳附載張后傳中舊書則列傳於吳后之前考

鄭志廢妃亦為立傳今依舊書補入次於吳后之後

代宗貞懿獨孤皇后父穎左威衛錄事參軍后以姝艷

居常專夜帝即位冊貴妃生韓王迥華陽公主大厯十

年薨追號為皇后上謚帝悼思不已故殯內殿累年不

外葬後三年始詔於都左治陵欲朝夕望見之補闕姚

南仲諫而止乃葬莊陵詔宰相常袞為哀冊帝於后厚

故送終華廣務稱其情詔羣臣為挽詞帝擇其尤悲者

令歌之初后愛遇第一官其宗叔卓少府監兄良佐太子中允

睿貞沈皇后吳興人開元末以良家子入東宮太子以賜廣平王實生德宗天寶亂賊囚后東都掖庭王入洛復留宮中時方北討未及歸長安而河南為史思明所沒遂失后所在代宗立以德宗為皇太子詔訪后所在不能得德宗即位乃先下詔贈后曾祖士衡太保祖介福太傅父易直太師從父易良司空易直子震太尉一

日封拜百二十七人建中元年乃具冊前上皇太后尊號帝供帳舍元殿具袞冕出自左序立東方羣臣在位帝再拜奉冊歎歔感咽左右皆泣於是中書舍人高叅上議漢文帝即位遣薄昭迎太后於代今宜用漢故事令有司擇日分遣諸沈行州縣物色咨訪以述宣皇帝孝思意冀上天降休靈命允荅須審知皇太后行在然後遣大臣備法駕奉迎帝乃以睦王述為奉迎使工部尚書喬琳副之昇平公主侍起居使者分行天下故中

官高力士女頗能言禁中事與女官李真一嘗從后遊
李見高疑問之含糊不堅而年狀差似於是迎還上陽
宮馳以聞帝喜羣臣皆賀力士子知非是具言其情詔
貸之帝謂左右吾寧受百罔冀一得真於是自謂太后
者數矣及索驗左皆辭窮終帝世無聞焉貞元七年詔
贈外高祖琳為司徒封徐國公為立五廟以琳為始祖
詔族子房為金吾將軍奉其祀憲宗即位有司建言皇
太后沈氏厭代二十有七年大行皇帝至孝哀思罔極

建中時發明詔遣使者奉迎凡舟車所至罔不逮歲推
月遷參訪理絕請因大行皇帝啟殯詔羣臣為皇太后
發哀肅章內殿中人奉廬衣置幄坐宮中朝夕上食告
天地宗廟上太皇太后諡冊作神主祔代宗廟備法駕
奉褱衣納於元陵祠室詔曰可

崔妃博陵安平人父岫秘書少監母楊氏韓國夫人當
代宗為廣平王時玄宗選韓國之女嬪於廣平邸禮儀
甚盛生召王伉初妃掖母氏之勢性頗妬悍及西京陷

賊母黨皆誅妃從王至靈武恩顧漸薄達京而薨

按新書附

載崔妃事於獨孤后傳中今
床舊書別為立傳以昭畫一

德宗昭德王皇后帝為魯王時納為嬪生順宗尤見寵
禮既即位冊號淑妃贈其父遇揚州大都督子姓姻出
悉得官貞元三年妃久疾帝念之遂立為皇后冊禮方
訖而后崩羣臣大臨三日帝七日釋服將葬后母郕國
夫人請設奠有詔祭物無用寓欲祭聽之於是宗室王
大臣李晟渾瑊等皆祭自發塗日日奠終發引乃止葬

靖陵置令丞如他靈臺立廟奏坤元之舞敕宰相張延
賞柳渾等製樂曲帝嫌文不工李紆上諡冊曰大行皇
后帝又謂不典並詔翰林學士吳通玄改謨冊曰咨后
王氏然議者謂岑文本所上文德皇后冊言皇后長孫
氏為得禮永貞元年改祔崇陵

韋賢妃戚里舊族祖濯尚定安公主貞元四年冊拜賢
妃宮壺事無不聽而性敏淑言動皆有繩矩帝寵重之
後宮莫不師其行帝崩自表留奉崇陵園元和四年薨

順宗莊憲王皇后瑯琊人祖難得有功名於世代宗時
后以良家選入宮為才人順宗在藩帝以才人幼故賜
之為王孺人是生憲宗王在東宮冊為良娣后性仁順
宮中化其德莫不柔雍順宗即位疾已綿頓后侍醫藥
不稍怠將立后会病棘而止憲宗內禪尊為太上皇后
元和元年乃上尊號曰皇太后后謹畏深抑外家無絲
毫假貸訓厲內職有古后妃風十一年崩按新書作十
年崩帝紀載
十一年三月庚午皇太后崩與舊書
紀傳相符則十年誤也今從帝紀改年五十四遺令皇

卷七十二
帝宜三日聽政二十七日釋服天下吏民令到臨三日
止宮中非朝暮臨無輒哭無禁昏嫁祠祀飲酒食肉已
釋服聽舉樂侍醫無加罪陪紼如舊制有司上諡葬豐
陵

憲宗懿安郭皇后汾陽王子儀之孫父曖尚昇平公主
實生后憲宗為廣陵王聘以為妃順宗以其家有大功
烈而母素貴優禮之異諸婦是生穆宗元和元年進冊
貴妃八年十二月羣臣三請立為后帝以歲暮來年有

子午忌且止

新書云八年羣臣三請立為后帝以歲子午忌按資治通鑑元和八年歲在癸巳其

來年則甲午也舊書較明晰從之

是時後庭多嬖艷恐后得尊位鉗掣

不得肆故章報聞罷穆宗嗣位上尊號皇太后贈峻太

尉母齊國大長公主擢兄釗刑部尚書鑑金吾大將軍

后移御興慶宮凡朔望三朝帝率百官詣宮門為壽或

歲時慶問宴饗後宮戚里內外婦車駢駢壅環珮之聲

滿宮帝亦豪矜朝夕供御務華衍侈大稱后意后嘗幸

驪山登覽徘徊詔景王督禁甲從帝至昭應奉迎留帳

飲數日還帝崩中人有為后謀稱制者后怒曰吾效武氏耶今太子雖幼尚可選重德為輔吾何與外事哉敬宗立號太皇太后寶歷之變后召江王嗣皇帝位是為文宗文宗性謹孝事后有禮凡羞果鮮珍及四方奇奉必先獻宗廟三宮而後御之武宗喜畋遊角武抃擇五方小兒得出入禁中他日問后起居從容請曰如何可為盛天子后曰諫臣章疏宜審覽可用用之有不可以詢宰相毋拒直言勿納偏言以忠良為腹心此盛天子

也帝再拜還索諫章閱之往往道遊獵事自是畋幸稀
小兒武弁等不復橫賜矣宣宗立於后諸子也而母鄭
故侍兒有襄怨帝奉養禮稍簿后鬱鬱不聊與一二侍
人登勤政樓將自隕左右共持之帝聞不喜是夕后崩

按舊書云宣宗繼統恩禮愈異於前朝賁
治通鑑所載則與新書相合今從新書

有司上尊諡

葬景陵外園太常官王皞請后合葬景陵以主祔憲宗
室帝不悅令宰相白敏中讓之皞曰后乃憲宗東宮元
妃事順宗為婦歷五朝母天下不容有異論俄貶皞句

容令懿宗咸通中舉還為禮官申抗前論乃詔后主祔於廟

孝明鄭皇后丹陽人或言本介朱氏元和初李錡反有相者言后當生天子錡聞納為侍人錡誅沒入掖庭侍懿安后憲宗幸之生宣宗宣宗為光王后為王太妃及即位尊為皇太后太后不肯別處故帝奉養大明宮朝夕躬省候焉懿宗立尊后為太皇太后咸通三年帝奉后宴三殿命翰林學士侍立結綺樓下六年

舊書作崩大中末

移伏西內上謚冊葬景陵旁園

穆宗恭僖王皇后越州人本仕家子幼得侍帝東宮生

敬宗長慶時冊為妃敬宗立上尊號為皇太后贈后父

紹卿司空母張追封趙國夫人文宗時稱寶歷太后太

和五年

舊書作太和八年

宰相建白以太皇太后與寶歷太后

稱號未辨前代詔令不敢斥言皆以宮為稱今寶歷太

后居義安殿宜曰義安太后詔可會昌五年崩有司上

謚葬光陵東園

貞獻蕭皇后閩人也穆宗為建安王后得侍生文宗文宗立上尊號曰皇太后初后去家入長安不復知家存亡惟記有弟帝為訪之俄有男子蕭弘因后姊壻呂璋白之太后謂得真弟悲不自勝帝拜弘金吾將軍出為河陽三城節度使稍徙廊坊會閩有男子蕭本又稱太后弟仇士良以聞召弘下獄按治乃代人詔流驩州不半道賜死擢本贊善大夫寵贈三世帝以為真不淹旬賜累鉅萬然太后真弟庸輒莫能自達本始得其家系

仇士良主之遂聽不疑歷衛尉卿金吾將軍會福建觀
察使唐扶上言泉州男子蕭弘自言太后弟御史臺參
治非是昭義劉從諫又為言請與本辨有詔三司馬元
裕孫簡崔鵬雜問乃皆妄本流愛州弘儋州而太后終
不獲弟初太和中懿安太后居慶興宮寶歷太后居義
安殿后居大內號三宮太后帝每五日問安及歲時慶
謁率由複道至南內開成中正月望夜帝御咸泰殿大
然燈作樂迎三宮太后奉觴進壽如家人諸王公主皆

得侍武宗時從積慶殿又號積慶太后大中元年

舊書作會

昌崩上令諡

宣懿韋皇后失其先世穆宗為太子后得侍生武宗長
慶時冊為妃武宗立妃已亡追冊為皇太后上尊諡又
封后二女弟為夫人有司奏太后陵宜別制號帝乃名
所葬園曰福陵既又問宰相葬從光陵與但祔廟孰安
奏言神道安於靜光陵因山為固且二十年不可更穿
福陵崇築已備當遂就之臣等請奉主祔穆宗廟便帝

乃下詔朕因誕日展禮於太皇太后謂朕曰天子之孝
莫大於承續今穆宗皇帝虛合享之位而宣懿太后實
生嗣君當以祔廟由是奉后合食穆宗室

尚宮宋若昭具州清陽人世以儒聞父廷芬能辭章生

五女皆警慧善屬文長若莘

舊書作
若莘

次若昭若倫若憲

若荀莘昭文尤高性皆素潔鄙薰澤靚妝不願歸人欲
以學名家家亦不欲與寒鄉凡裔為姻對聽其學若莘
誨諸妹如嚴師著女論語十篇大抵準論語以韋宣文

君代孔子

宣文君即韋逞母

曹大家等為顏冉推明婦道所宜

若昭又為傳申釋之貞元中昭義節度使李抱真表其

才德宗召入禁中試文章并問經史大義帝咨美悉留

宮中帝能詩每與侍臣賡和五人者皆預凡進御未嘗

不蒙賞又高其風操不以妾侍命之呼學士擢其父饒

州司馬元和末若莘卒贈河內郡君自貞元七年凡秘禁

圖籍詔若莘總領穆宗以若昭尤通練拜尚宮嗣若莘

所職歷憲穆敬三朝皆呼先生后妃與諸公主率以師

禮見寶歷初卒贈梁國夫人以鹵簿葬若憲代司秘書
文宗尚學以若憲善屬辭尤禮之大和中李訓鄭注用
事惡宰相李宗閔譖言因駙馬都尉沈熾厚賂若憲求
執政帝怒幽若憲外第賜死家屬徙嶺南訓注敗帝悟
其讒追恨之若論若荀早卒廷芬男蜀愚不可教為民
終身

敬宗貴妃郭氏右威衛將軍義之子長慶時以容選入
太子宮太子即位為才人生晉王普帝以早得子又母

淑麗冠後庭故寵異之踰年為貴妃贈義禮部尚書兄
環少府少監賜大第文宗立愛晉王若已子待妃禮不
衰

武宗賢妃王氏邯鄲人年十三善歌舞得入宮中穆宗
以賜頴王性機悟開成末王嗣帝位妃陰為助畫故進
號才人遂有寵帝欲立為后宰相李德裕曰才人無子
且家不素顯恐貽天下議乃止帝稍惑方士說欲餌藥
長年後寢不豫才人每謂親近曰陛下日燎丹言我取

不死膚澤消槁吾獨憂之俄而疾亟才人侍左右帝熟
視曰吾氣息奄奄情慮耗盡願與汝辭答曰陛下大福
未艾安語不祥帝曰脫如我言奈何對曰陛下萬歲後
妾得以殉帝不復言及大漸才人悉取所常貯散遺官
中審帝已崩即自經幄下當時嬪媛雖常妬才人專上
者返皆義才人為之感慟宣宗即位嘉其節贈賢妃葬
端陵之柏城

欽定續通志卷七十二

欽定四庫全書

欽定續通志卷七十三

后妃傳三

唐三

宣宗元昭曩皇后

懿宗惠安王皇后

恭憲王皇后

郭淑妃

昭宗何皇后

宣宗元昭曩皇后不詳其世少入邸最見寵答及即位

以為美人大中中薨贈昭容詔翰林學士蕭寔銘其窆
具載生鄆王萬壽公主後夔昭等五王居內院而鄆獨
出閣及即位是為懿宗外頗疑帝非長寔出銘辭以示
外庭乃解帝追冊昭容為皇太后上尊諡詔后二等以
上親悉官之配主宣宗廟自建陵曰慶陵置宮寢

懿宗惠安王皇后亦失所來咸通中冊號貴妃生普王
七年薨十四年王即位是為僖宗追尊皇太后冊上諡
號祔主懿宗廟即其園為壽陵后屬總以上帝悉官之

恭憲王皇后其出至微咸通中列後庭得幸生壽王而卒王立是為昭宗追號皇太后上諡祔主懿宗室即故
懿號安陵召后帝璵官之景福初璵位任寢重帝亦以外家倚之為中尉楊復恭所媚表為黔南節度使璵之
鎮道吉柏江復恭密諭楊守亮覆其家

郭淑妃幼入鄆王邸宣宗在位春秋高惡人言立太子
事王以嫡長居外宮心常憂惴妃護侍左右慰安起居
終得無恙生女未能言忽曰得活王驚異之及即位以

妃為美人進拜淑妃女為同昌公主下嫁韋保衡保衡處內宅妃以主故出入娛飲不禁是時譁言與保衡亂莫得其端僖宗立保衡緣他罪為人所發且汙舊謗卒貶死妃猶處禁中黃巢之難天子出蜀倉卒妃不及從遂流落閭里不知所終

昭宗何皇后梓州人系族不顯帝為壽王后得侍婉麗多智恩答厚甚既即位號淑妃從狩華州詔冊為皇后生哀帝德王裕平原公主

按吳縝糾謬云凡后妃傳必書所生獨何后傳不書然縝

亦祇引哀帝德王為證而未及平
原公主也今考公主傳並為補入光化三年帝獵夜歸

后遣德王還邸遇劉季述留王紫庭院明日季述等挾
王陳兵召百官脅帝內禪后恐賊加害天子即取璽授
季述與帝同幽東宮賊平反正天復中從帝幸鳳翔李
茂貞請帝勞軍不得已后從御南樓會朱全忠逼帝東
遷后謂帝曰此後大家夫婦委身賊手矣涕數行下帝
奔播既屢威柄盡喪左右皆捍逆庸奴
按吳縝糾諫捍當作悍后
侍膳服無須臾去側至洛帝憂忽忽與后相視無死所

已而遇弑哀帝即位尊為皇太后宮中不敢哭徙居積
善宮號積善太后帝將禪天下后亦遇害初蔣玄暉為
全忠邀九錫入喻后度不免見玄暉垂泣祈哀以母子
託命宣徽使趙殷衡譖於全忠曰玄暉等銘石像瘞積
善宮將復唐全忠怒遂遣人縊后以醜名加之廢為庶
人

公主附

世祖一女

同安公主高祖同母妹也下嫁隋州刺史王裕貞觀時以屬尊進大長公主永徽初賜實戶三百薨裕隋司徒東之子終開府儀同三司

高祖十九女

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能偕奈

何主曰公行矣我自為計紹詭道走并州主奔鄆發家
資招南山亡命得數百人以應帝於是名賊何潘仁壁
司竹園殺行人稱總管主遣家奴馬三寶喻降之共攻
鄆別部賊李仲文向善志丘師利等各持所領會戲下
因略地盤屋武功始平下之乃申法誓衆禁剽奪遠近
咸附勒兵七萬威振關中帝度河紹以數百騎並南山
來迎主引精兵萬人與秦王會渭北紹及主對置幕府
分定京師號娘子軍帝即位以功給賚不涯武德六年

薨葬加前後部羽葆鼓吹大路麾幢虎賁甲卒班劍太常議婦人葬古無鼓吹帝不從曰鼓吹軍樂也往者主身執金鼓參佐命于古有邪宜用之

高密公主下嫁長孫孝政又嫁段綸綸隋兵部尚書文振子為工部尚書杞國公永徽六年主薨遺命吾葬必令墓東向以望獻陵冀不忘孝也

長廣公主始封桂陽下嫁趙慈景慈景隴西人帝美其姿制故妻之帝起兵或勸亡去答曰毋以我為命且安

往吏捕繫于獄帝平京師引拜開化郡公為華州刺史
討堯君素戰死贈秦州刺史諡曰忠公主更嫁楊師道
聰悟有思工為詩豪侈自肆晚稍折節以壽薨

長沙公主始封萬春下嫁豆盧寬子懷讓

房陵公主始封永嘉下嫁竇奉節又嫁賀蘭僧伽

九江公主下嫁執失思力

廬江公主下嫁喬師望為同州刺史

南昌

吳鎮云蘇勗
傳作南康

公主下嫁蘇勗

安平公主下嫁楊思敬

淮南公主下嫁封道言

吳縝云封倫傳作言道

真定公主下嫁崔恭禮

按吳縝糾謬云公主傳言真定公主嫁崔恭禮館陶公主嫁崔

宣慶而崔器傳云恭禮尚館陶今考舊書器傳亦同則此處誤也

衡陽公主下嫁阿史那社爾

丹陽公主下嫁薛萬徹萬徹養甚公主羞不與同席者數月太宗聞笑焉為置酒悉召它壻與萬徹從容語握槲賭所佩刀陽不勝遂解賜之主喜命同載以歸

臨海公主下嫁裴律師

館陶公主下嫁崔宣慶

安定公主始封千金下嫁溫挺挺死又嫁鄭敬玄

常樂公主下嫁趙瓌生女為周王妃武后殺之逐瓌括
州刺史徙壽州越王貞將舉兵遺瓌書假道瓌將應之
主進使者曰為我謝王與其進不與其退若諸王皆丈
夫不應淹久至是我聞楊氏篡周尉遲迴乃周出猶能
連突厥使天下響震況諸王國懿親宗社所託不捨生

取義尚何須耶人臣同國患為忠不同為逆王等勉之王敗周興劾瓌與主連謀皆被殺

太宗二十一女

襄城公主下嫁蕭銳性孝睦動循矩法帝敕諸公主視為師式有司告營別第辭曰婦事舅姑如父母異宮則定省闕止葺故第門列雙戟而已銳卒更嫁姜簡永徽二年薨

汝南公主蚤薨

南平公主下嫁王敬直以累斥嶺南更嫁劉玄意

遂安公主下嫁竇達達死又嫁王大禮

長樂公主下嫁長孫冲帝以長孫皇后所生敕有司裝
齋倍長公主魏徵諫止之

豫章公主下嫁唐義識

按吳縝糾繆云唐儉傳及宰相世系表皆作善識則義字誤也

今姑仍
原文

北景公主始封巴陵下嫁柴令武坐與房遺愛謀反同

主賜死

普安公主下嫁史仁表

東陽公主下嫁高履行高宗即位進為大長公主韋正
矩之誅主坐婚家斥徙集州又坐章懷太子累奪邑封
臨川公主韋貴妃所生下嫁周道務主工籀隸能屬文
高宗立上孝德頌帝下詔褒答永徽初進長公主恩賞
卓異永淳初薨道務殿中大監譙郡公範之子歷營州
都督檢校右驍衛將軍諡曰襄

清河公主名敬字德賢下嫁程懷亮薨麟德時懷亮知

節子也

按吳鎮糾繆云程知節傳載子處亮尚清河公主懷字當是處字之誤

終寧遠將

軍

蘭陵公主名淑字麗貞下嫁竇懷愁薨顯慶時懷愁官
兗州都督太穆皇后之族子

晉安公主下嫁韋思安又嫁楊仁輅

安康公主下嫁獨孤謀

新興公主下嫁長孫曦

城陽公主下嫁杜荷坐太子承乾事誅又嫁薛瓘初主

之婚帝使卜之繇曰二火皆食始同榮末同戚請晝昏
則吉馬周諫曰朝謁以朝思相戒也講習以晝思相成
也燕飲以晝思相歡也婚合以夜思相親也今先亂其
始不可帝乃止麟德初瓘歷左奉宸衛將軍主坐巫蠱
斥瓘房州刺史主從之官咸亨中主薨而瓘卒雙柩還
京師子顗封河東縣侯濟州刺史琅邪王冲起兵顗與
弟紹以所部庸調作兵募士且應之冲敗殺都吏以滅
口事泄下獄俱死

合浦公主始封高陽下嫁房玄齡子遺愛主帝所愛故
禮異他壻主負所愛而驕房遺直以嫡當拜銀青光祿
大夫讓弟遺愛帝不許玄齡卒主導遺愛異貲既而反
譖之遺直自言帝痛讓主乃免自是稍疏外主怏怏永
徽中與遺愛謀反賜死

金山公主蚤薨

晉陽公主字明達幼字兕子文德皇后所生后崩時主
始孩不之識及五歲經后所游地哀不自勝帝諸子唯

晉王及主最少故親畜之王每出閤主送至度化門泣而別王勝衣班于朝主泣曰兄今與羣臣同列不得在內乎臨帝飛白書下不能辨薨年十二

常山公主未及下嫁薨顯慶時

新城公主晉陽母弟也下嫁長孫詮詮以罪徙舊州更嫁韋正矩為奉冕大夫遇主不以禮儀而主暴薨高宗詔三司雜治正矩不能辨伏誅

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗
天授中勗為武后所誅神龍初進冊長公主實封千戶
開府置官屬睿宗立增戶千薨開元時

太平公主則天皇后所生后愛之傾諸女下嫁薛紹紹
死更嫁武承嗣會承嗣小疾罷婚後殺武攸暨妻以配
主主方額廣頤多陰謀后常謂類我而主內與謀外檢
畏終后世無它訾永淳之前親王食實戶八百增至千

輒止公主不過三百而主獨加戶五千及聖歷時進及三千戶預誅二張功增號鎮國與相王均封五千與相王衛王成王長寧安樂二公主給衛士環第十步一區持兵呵衛僭肖宮省神龍時與長寧安樂宜城新都定安金城凡七公主皆開府置官屬視親王主三子崇簡崇敏崇行皆拜三品韋后上官昭容用事自以謀出主下遠甚憚之主亦自以軋而可勝故益橫於是推進天下士謂儒者多窶狹厚持金帛謝之以動大議遠近翕

然嚮之玄宗將誅韋氏主與秘計遣子崇簡從事定將立相王未有以發其端者主顧溫王乃兒子可劫以為功乃入見王曰天下事歸相王此非兒所坐乃掖王下取乘輿服進睿宗睿宗即位主權由此震天下加實封至萬戶三子封王餘皆祭酒九卿主每奏事漏數徙乃得退所言皆從有所論薦或自寒穴躡進至侍從旋踵將相朝廷大政事非闕決不下間不朝則宰相就第咨判天子殆畫可而已主侍武后久善策人主微指先事

逢合無不中田園徧近甸皆上腴吳蜀嶺嶠市作器用
州縣護送道相望也天下珍滋譎怪充于家供帳聲伎
與天子等侍兒曳紈縠者數百奴伯嫗監千人隴右牧
馬至萬匹長安浮屠慧範畜貲千萬諧結權近本善張
易之及易之誅或言其豫謀者於是封上庸郡公月給
奉稍主乳媪與通奏擢三品御史大夫玄宗以太子監
國使宋王岐王總禁兵主恚權分乘輦至光範門召宰
相白廢太子於是宋璟姚元之不悅請主出東都帝不

許詔主居蒲州主大望太子懼奏斥璟元之以銷戢怨
嬖主居外四月太子表追還京師時宰相七人五出主
門下又左羽林大將軍常元楷知羽林軍李慈皆私謁
主主內忌太子明又宰相皆其黨乃有逆謀先天二年

即開元元年也考是年玄宗已即位而
傳中尚稱太子豈以睿宗尚與政故耶與尚書左僕射

竇懷貞侍中岑羲中書令蕭至忠崔湜太子少保薛稷

雍州長史李晉右散騎常侍昭文館學士賈膺福鴻臚

卿唐駿及元楷慈慧範等

按資治通鑑載太平公主謀
逆時尚有左金吾將軍李欽

中書舍人李猷本
傳不載今附錄

謀廢太子使元楷慈舉羽林兵入武
德殿殺太子懷貞義至忠舉兵南衙為應既有日矣太
子得其姦召岐王薛王兵部尚書郭元振將軍王毛仲
殿中少監姜皎中書侍郎王琚吏部侍郎崔日用定策
前一日因毛仲取內閑馬三百率太僕少卿李令問王
守一內侍高力士果毅李守德叩虔化門梟元楷慈於
北闕下縛膺福內容省執義至忠至朝堂斬之因大赦
天下主聞變亡入南山三日不出賜死于第諸子及黨

與死者數十人簿其田貲瓌珎若山督子貸凡三年不能盡崇簡素知主謀苦諫主怒撈尤楚至是復官爵賜氏李始主作觀池樂游原以為盛集既敗賜寧申岐薛四王都人歲祓禊其地

中宗八女

新都公主下嫁武延暉

宜城公主始封義安郡主下嫁裴巽巽有嬖妹主恚削耳削鼻且斷巽髮帝怒斥為縣主巽左遷久之復故封

神龍元年與長寧新寧

原文有義安二字吳縝謂此即義安郡主傳不宜複見今從刪

安樂新平郡主皆進封

定安

文獻通考作安定

公主始封新寧郡主下嫁王同皎同皎

得罪神龍時又嫁韋濯濯即韋皇后從祖弟以衛尉少

卿誅更嫁大府卿崔鉞薨

長寧公主韋庶人所生下嫁楊慎交造第東都府財幾

竭又取西京高士廉第左金吾衛故營合為宅右屬都

城左順大道作三重樓以馮觀築山浚池帝及后數臨

幸置酒賦詩又并坊西隙地廣鞠場東都廢永昌縣主
勾其治為府以地瀕洛築鄣之崇臺蜚觀相聯屬魏王
泰故第東西盡一坊瀦沼三百畝泰薨以與民主內倚
母愛寵傾一朝與安樂宜城二主后媚邠國崇國夫人
爭任事賊謁紛紜東都第成不及居韋氏敗斥慎交絳
州別駕主偕往開元十六年慎交死更嫁蘇彥伯

永壽公主下嫁韋鐵蚤薨

永泰公主以郡主下嫁武延基大足中忤張易之為武

后所殺

安樂公主最幼女帝遷房陵而主生解衣以祿之名曰
裹兒妹秀辯敏后尤愛之下嫁武崇訓帝復位光艷動
天下侯王柄臣多出其門嘗作詔箱其前請帝署可帝
笑從之又請為皇太女左僕射魏元忠諫不可主曰元
忠山東木強烏足論國事阿武子尚為天子天子女有
不可乎與太平等七公主皆開府而主府官屬尤濫皆
出屠販納貨售官降墨敕斜封授之故號斜封官嘗請

昆明池為私沼帝曰先帝未有以與人者主不悅自鑿
定昆明池延袤數里司農卿趙履溫為繕治累石肖華山
澄約橫邪回淵九折以石漢水又為寶鑪鏤怪獸神禽
間以瑇貝珊瑚不可涯計崇訓死主素與武延秀亂即
嫁之是日假后車輅自宮送至第帝與后為御安福門
臨觀翌日大會羣臣太極殿主被翠服出嚮天子再拜
南面拜公卿公卿皆伏地稽首武攸暨與太平公主偶
舞為帝壽賜羣臣帛數十萬奪臨川長公主宅以為第旁

徹民廬怨聲囂然第成禁藏空殫假萬騎仗內廷樂送
主還第天子親幸宴近臣公主滿孺月帝后復幸第大
赦天下時主與長寧定安三家廝臺掠民子女為奴婢
左臺侍御史袁從一縛送獄主入訴帝為手詔喻免臨
淄王誅庶人主方覽鏡作眉聞亂走至右延明門兵及
斬其首

按舊書武延秀傳韋庶人敗延秀與公主在內宅格戰良久皆斬之與本傳異

追貶為

悖逆庶人睿宗即位詔以二品禮葬之趙履溫諂事主
嘗褫朝服以項挽車庶人死蹈舞承天門呼萬歲臨淄

王斬之

成安公主字季姜始封新平下嫁韋捷捷以韋后從子
誅主後薨

睿宗十一女

壽昌公主下嫁崔真

安興昭懷公主蚤薨

荊山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

涼國公主字華莊始封仙源下嫁薛伯陽

按吳縝糾謬云溫彥博傳

載曾孫曦尚涼國長公主而公主傳止有涼國公主下嫁薛伯陽又荆山公主亦嫁薛伯陽二者必有一誤今考舊書薛稷傳亦云子伯陽尚仙源公主仙源為涼國舊封則涼國之下嫁伯陽無疑也尚溫曦實尚荆山而

史記雖抑別有涼國長公主而史闕歟

薛國公主始封清陽下嫁王守一守一誅更嫁裴巽

郎國公主崔貴妃所生三歲而妃薨哭泣不食三日如

成人始封荆山下嫁薛儼又嫁鄭孝義

金仙公主始封西城縣主景雲初進封太極元年與玉真公主皆為道士

玉真公主字持盈

舊書玄宗紀云賜名摘盈

始封崇昌縣主俄進號

上清玄都大洞三景師天寶三載上言曰先帝許妾捨家今仍叨主第食租賦誠願去公主號罷邑司歸之王府玄宗不許固請乃許之薨寶應時

霍國公主下嫁裴虛已

玄宗二十九女

按吳縝糾謬玄宗二十九女按其名數乃有三十人則二十九字誤也

永穆公主下嫁王絳

常芬公主下嫁張去奢

按吳縝糾謬言肅宗張皇后傳載去盈尚常芬公主此處則云

去奢今考舊書后傳亦云去盈奢字當是盈字之誤

孝昌公主蚤薨

唐昌公主下嫁薛鏞

靈昌公主蚤薨

常山公主下嫁薛譚又嫁竇澤

萬安公主天寶時為道士開元新制長公主封戶二千

帝妹戶千率以三丁為限皇子王戶二千主半之左右
以為薄帝曰百姓租賦非我有士出萬死賞不過束帛
女何功而享多戶耶使知儉嗇不亦可乎於是公主所
稟始不給車服後咸宜以母愛益封至千戶諸主皆增
自是著于令主不下嫁亦封千戶有司給奴婢如令

上仙公主蚤薨

懷思公主蚤薨

晉國公主始封高都下嫁崔惠童貞元元年與衛楚宋

齊宿蕭鄧紀部國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜

吳縝云當作鄭潛曜 堯大

歷時

衛國公主始封建平下嫁豆盧建又嫁楊說堯貞元時

貞楊公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得

入侍興元元年請為道士詔可賜名上善

普康

文獻通考
作普昌

公主蚤薨咸通九年追封

昌樂公主高才人所生下嫁寶鏐薨大歷時

永寧公主下嫁裴齊邱

宋國公主始封平昌下嫁溫西華又嫁楊徽薨元和時

齊國公主始封興信徙封寧親下嫁張垧又嫁裴潁末

嫁楊敷薨貞元時

咸宜公主貞順皇后所生下嫁楊洄又嫁崔嵩薨興元

時

宜春公主蚤薨

廣寧公主董芳儀所生下嫁程昌裔

原文作程昌胤按吳縝糾謬云楊貴

妃傳載駙馬都尉程昌裔今考舊書俱作裔謹改正

又嫁蘇克貞薨大歷時

萬春公主杜美人所生下嫁楊肱

吳縝云肱當從日

又嫁楊錡

薨大歷時

太華公主貞順皇后所生下嫁楊錡薨天寶時

壽光公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁

裴玲又嫁姜慶初慶初得罪主幽禁中薨大歷時

壽安公主曹野那姬所生下嫁蘇發

肅宗七女

宿國公主始封長樂下嫁豆盧湛

蕭國公主始封寧國下嫁鄭巽又嫁薛康衡乾元元年

降回紇英武威遠可汗

舊書誤作上皇第二女

乃置府二年還朝

貞元中讓府屬更置邑司

和政公主章敬太后所生生三歲后崩養于韋妃性敏
惠事妃有孝稱下嫁柳潭安祿山陷京師寧國公璽方
嫠居主棄三子奪潭馬以載寧國身與潭步日百里潭
躬水薪主躬爨以奉寧國從玄宗至蜀始封遷潭駙馬
都尉郭千仞反玄宗御玄英樓諭降之不聽潭率折衝
張義童等殊死鬪主殺弓授潭潭手斬賊五十級平之
肅宗有疾主侍左右勤勞詔賜田以女弟寶章生未有

賜固讓不敢當阿布思之妻隸掖廷帝宴使衣綠衣為倡主諫曰布思誠逆人妻不容近至尊無罪不可與羣倡處帝為免出之自兵興財用耗主以貿易取奇贏千萬贍軍及帝山陵又進邑入千萬代宗初立屢陳人間利病國家盛衰事天子鄉納吐蕃犯京師主避地南奔次商於遇羣盜主諭以禍福皆稽顙願為奴代宗以主貧詔諸節度餉億主一不取親紉綻裳衣諸子不服紉締廣德時吐蕃再入寇主方姪入語備邊計潭固止主

曰君獨無兄乎入見內殿翌日免乳而薨

郟國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大歷時

郛國公主始封延光下嫁裴徽又嫁蕭升升卒主與彭

州司馬李萬亂而蜀州別駕蕭鼎澧陽令韋憚太子詹

事李昇

通鑑考異云李
泌家傳作昇

皆私侍主家久之姦聞德宗怒

幽主它第杖殺萬斤鼎憚昇嶺表貞元四年又以厭蠱

廢

按綱目載李昇出入主第且為厭禱德宗大怒幽主禁中流昇等嶺表在貞元三年

六年薨主

女為皇太子妃帝畏妃怨望將殺之未發會主薨太子屬疾乃殺妃以厭災諡曰惠

代宗十八女

靈仙公主蚤薨追封

真定公主蚤薨追封

永清公主下嫁裴傲

齊國昭懿公主崔貴妃所生始封升平下嫁郭曖大厯

末寨內民訴涇水為碇壅不得溉田京兆尹黎幹以請
詔撤碇以水與民時主及曠家皆有碇勾留帝曰吾為
蒼生若可為諸戚倡即日毀由是廢者八十所憲宗即
位獻女伎帝曰太上皇不受獻朕何敢違還之薨元和
時贈號國賜諡

華陽公主貞懿皇后所生韶悟過人帝愛之大歷七年
以病勾為道士號瓊華真人病甚嚙帝指傷薨追封
玉清公主蚤薨追封

嘉豐公主下嫁高怡與普寧公主同降薨建中時

長林公主下嫁衛尉少卿沈明貞元二年具冊禮薨元
和時

太和公主蚤薨追封

趙國莊懿公主始封武清貞元元年徙封嘉誠下嫁魏
博節度使田緒德宗幸望春亭臨餞厭翟敝不可乘以
金根代之公主出降乘金根車自主始薨元和時贈封
及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨太和時

義清公主下嫁祕書少監柳杲

壽昌公主下嫁光祿少卿竇克良薨貞元時

新都公主貞元十二年下嫁田華

西平公主蚤薨

章寧公主蚤薨

德宗十一女

韓國貞穆公主昭德皇后所生幼謹孝帝愛之始封唐安將下嫁祕書少監韋甯未克而朱泚亂從至城固薨加封諡

魏國憲穆公主始封義陽下嫁王士平主恣橫不法帝幽之禁中錮士平于第久之拜安州刺史坐交中人貶賀州司戶參軍門下客蔡南史獨孤申叔為主作團雪散雪辭狀離曠意帝聞怒捕南史等逐之薨追封及諡

鄭國莊穆公主始封義章下嫁張孝忠子茂宗薨加贈
及諡

臨真公主下嫁祕書少監薛釗薨元和時

永陽公主下嫁殿中少監崔諲

普寧公主蚤薨

文安公主勾為道士薨太和時

燕國襄穆公主始封咸安下降回紇武義成功可汗置

府薨元和時追封及諡

義川公主蚤薨

宜都公主下嫁殿中少監柳昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭
縱永貞元年與諸公主皆進封時戚近爭為奢調事主
獨以儉文宗尤惡世流侈因主入問曰姑所服何年法
也今之弊何代而然對曰妾自貞元時辭宮所服皆當

時賜未嘗敢變元和後數用兵悉出禁藏纖麗物賞戰士由是散於人間內外相矜狃以成風若陛下示所好予下誰敢不變帝悅詔宮人視主衣製廣狹徧諭諸主且敕京兆尹禁切浮靡主嘗誨諸女曰先姑有言吾與若皆帝子驕盈貴侈可戒不可恃開成五年薨

梁國恭靖公主與漢陽同生始封咸寧郡主徙普安下嫁鄭何薨追封及諡

東陽公主始封信安郡主下嫁崔杞

西河公主始封武陵郡主下嫁沈翬薨咸通時

按吳鎮糾謬言

郭子儀孫銘傳云尚西河公主主初降沈氏生一子銘無嗣以沈氏子為嗣是西河公主又嫁郭銘也本傳失載

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮

按舊書張孝忠

傳克禮乃茂昭之子孝忠之孫尚晉康郡主與新書同本傳誤

主縱恣常微行市里有

薛樞薛渾李元本皆得私侍而渾尤愛至謁渾母如姑

克禮以聞穆宗幽主禁中

潯陽公主崔昭儀所生太和三年與平恩邵陽二公主並為道士歲賜封物七百匹

臨汝公主崔昭訓所生蚤薨

虢國公主始封清源郡主徙陽安下嫁王承系薨追封

平恩公主蚤薨

邵陽公主蚤薨

憲宗十八女

梁國惠康公主始封普寧帝特愛之下嫁于李友元和

中徙永昌薨詔追封及諡

永嘉公主為道士

衡陽公主蚤薨

宣城公主下嫁沈瑒

鄭國溫儀公主始封汾陽下嫁韋讓薨追封及諡

岐陽莊淑公主懿安皇后所生下嫁杜悰事舅姑以禮
聞所賜奴婢偃蹇皆上還勾直自市悰為澧州刺史主
與偕從者不二十婢乘驢不肉食州縣供具拒不受姑

寢疾主不解衣藥糜不嘗不進開成中惊自忠武入朝
曰寢疾曰願朝興慶宮雖死於道不恨道薨

陳留公主下嫁裴損損為太子諭德

真寧公主下嫁薛翽

南康公主下嫁沈汾薨咸通時

臨真公主始封襄城下嫁衛洙薨咸通時

普康公主蚤薨

真源公主始封安陵下嫁杜中立

永順公主下嫁劉弘景

安平公主下嫁劉異宣宗即位宰相以異為平盧節度使帝曰朕惟一妹欲時見之乃止後隨異居外歲時輒乘驛入朝薨乾符時

永安公主長慶初許下嫁回鶻保義可汗會可汗死止不行太和年中為道士

義寧公主未及下嫁薨

定安公主始封太和下嫁回鶻崇德可汗會昌三年來

歸詔神策軍四百具鹵簿羣臣班迓主乘駱謁憲穆二
室欷歔流涕退詣光順門易服褫冠鑊待罪自言和親
無狀帝命中人勞慰復冠鑊乃入羣臣賀天子又詣興
慶宮明日主謁太皇太后進封長公主遂廢太和府主
始至宣城以下七主不出迎武宗怒差奪封絹贖罪
貴卿公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇瀚

金堂公主始封晉陵下嫁郭仲恭薨乾符時

清源公主薨太和時

饒陽公主下嫁郭仲詞

義昌公主為道士薨咸通時

安康公主為道士乾符四年詔還南內

敬宗三女

永興公主

天長公主

寧國公主薨廣明時

文宗四女

興唐公主

西平公主

朗寧公主薨咸通時

光化公主薨廣明時

武宗七女

昌樂公主

壽春公主

長寧公主薨大中時

延慶公主

靜樂公主薨咸通時

樂溫公主

永清公主薨咸通時

宣宗十一女

萬壽公主下嫁鄭顥主帝所愛前此下詔先王制禮貴
賤共之萬壽公主奉舅姑宜從士人法舊制車輿以鐐
金鈎飾帝曰我以儉率天下宜自近始易以銅主每進
見帝必諄勉篤誨曰無鄙夫家無干時事又曰太平安
樂之禍不可不戒故諸主祇畏爭為可喜事帝遂詔夫
婦教化之端其公主縣主有子而寡不得復嫁

永福公主

齊國恭懷公主始封西華下嫁嚴祁祁為刑部侍郎主
薨大中時追贈及諡

廣德公主下嫁于琮初琮尚永福公主主與帝食怒折
匕筋帝曰此可為士人妻乎更許琮尚主琮為黃巢所
害主泣曰今日誼不獨存賊宜殺我巢不許乃縊室中
主治家有禮法嘗從琮貶韶州侍者纔數人郤州縣饋
遺凡內外冠婚喪祭主皆身答勞疏戚咸得其心為世
聞婦

義和公主

饒安公主

盛唐公主

平原公主薨咸通時

唐陽公主

許昌莊肅公主下嫁柳涉薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸

通十年薨

資治通鑑作十一年

帝自製挽歌羣臣畢和又許百官

祭以金貝寓車廐服火之及葬帝與妃坐延興門哭以過柩仗衛彌數十里冶金為俑怪寶千計實墓中與乳保同葬追封及諡

安化公主

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平公主

昭宗十一女

新安公主

平原公主積善皇后所生帝在鳳翔以主下嫁李茂貞
子繼侶后謂不可帝曰不爾我無安所是日宴內殿茂
貞坐帝東南主拜殿上繼侶族兄弟皆西向立主徧拜
之及帝還朱全忠移茂貞書取主還京師

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

欽定續通志卷七十三

欽定四庫全書

欽定續通志卷七十四

后妃傳四

五代

梁

太祖母文惠王皇后

太祖元貞張皇后

陳昭儀

李昭容

末帝張德妃

郭妃

梁太祖母曰文惠皇后王氏單州單父人生三子長廣
王全昱次朗王存次太祖后少寡攜三子傭食蕭縣人
劉崇家太祖壯而無賴崇數加笞責獨崇母憐之時時
自為櫛沐戒家人曰朱三非常人也宜善遇之黃巢起
太祖與存俱亡為盜從巢攻廣州存戰死居數歲太祖
降唐及破巢遂鎮宣武乃遣人以車馬之蕭縣迎后於
崇家使者至門后惶恐走避曰朱三落魄無行作賊死
矣何以至此耶使者具道所以后乃驚喜泣下與崇母

俱載以歸封晉國太夫人太祖置酒太夫人前舉觴為
壽歡甚太祖啓曰朱五經平生讀書不登一第有子為
節度使無忝先人矣后惻然良久曰汝能至此可謂英
特然行義未必如先人也太祖請其故后曰朱二與汝
俱從黃巢獨死蠻嶺其孤皆在午溝汝今富貴獨不念
之乎太祖泣涕乃悉召存諸子以歸太祖剛暴好殺后
每誠之多賴以全活大順二年秋后疾卜曰宜還故鄉
乃歸卒於午溝太祖即位立四廟追尊皇考為文穆皇

帝后曰文惠皇后

太祖元貞皇后張氏單州碭山縣渠亭里富家子也

按北

夢瑣言父懿為宋州刺史

太祖少以婦聘之生末帝太祖貴封魏國

夫人后賢明精悍動有禮法太祖雖剛暴亦嘗畏之每暴怒殺戮得后救護輒免時以外事訪之后言多中嘗

出兵行至中途后意以為不然馳一介召之如期而至

邴王友裕既破走朱瑾不追太祖怒奪其兵友裕惶恐亡匿后陰教友裕脫身自歸友裕晨馳入見太祖拜伏

庭中泣涕請死太祖怒甚將斬之后聞之不及履走庭中持友裕泣曰汝束身歸罪豈不欲明非反乎太祖意解乃免太祖已破朱瑾納其妻以歸后迎太祖於封丘見瑾妻瑾妻再拜后亦拜悽然泣下曰兗鄆與司空同姓之國昆仲之間以小故興干戈而使吾姒至此若不幸汴州失守妾亦如此矣言已又泣太祖為之感動乃送瑾妻為尼后常給其衣食天福元年后卒

按天福乃石晉年號

后卒於梁祖末即位前應在唐代考唐末有天復天祐年號福復音近福祐形近未審何者之誤通鑑及會要

不載無可據
改姑存原文

太祖即位追冊為賢妃末帝立追諡曰元

貞皇太后

按五代會要開平二年追封賢妃乾化二年追冊為元貞皇后

后已死太祖

始為荒淫卒以及禍云

昭儀陳氏宋州人也以色進太祖嬪妾數百而昭儀專

寵太祖嘗疾昭儀與尼數十人晝夜為佛法不少懈太

祖以為愛已尤寵之開平三年度為尼居宋州佛寺

昭容李氏亦以色進尤謹愿未嘗去左右太祖病晝寢

方寐忽棟折獨李氏侍側遽牽太祖衣太祖驚走棟折

寢上太祖德之拜昭容皆不知所終

末帝德妃張氏父歸霸太祖功臣帝初以婦聘之及即位將冊為后妃請待帝郊天而帝卒不得郊貞明五年妃病甚帝遽冊為德妃其夕薨

次妃郭氏父歸厚事梁為登州刺史妃少以色進梁亡莊宗入宮梁故妃妾皆號泣迎拜賀王友雍妃石氏有色莊宗召之石氏慢罵殺之次召妃妃懼而聽命已而度為尼賜名誓正居洛陽卒初莊宗入汴末帝登建國

樓求自盡命控鶴指揮使皇甫麟進刃麟亦自剄莊宗命張全義葬其尸藏其首於太社晉天福三年詔許收葬乃出末帝首與妃同葬之

後唐

太祖劉太妃

貞簡曹皇后

莊宗神閔敬劉皇后

韓淑妃
伊德妃

明宗和武憲曹皇后

昭懿夏皇后

宣憲魏皇后

王淑妃

愍帝孔皇后

廢帝劉皇后

太祖正室劉氏代北人次妃曹氏太原人也太祖封晉王劉氏封秦國夫人自太祖起兵伐北劉氏常從征伐為人明敏多智畧頗習兵機常教其侍妾騎射以佐太祖上源驛之變左右有先脫歸者以難告夫人神色不動立斬告者陰召大將謀保軍以還遲明太祖還軍與夫人相嚮慟哭因欲舉兵擊梁夫人曰公本為國討賊今梁事未暴而遽反兵相攻天下聞之莫分曲直不若

敵軍還鎮自許于朝太祖從之其後太祖擊劉仁恭敗
歸梁遣氏叔琮康懷英等連歲攻晉圍太原晉兵屢敗
太祖憂窘不知所為李存信等勸太祖亡入北邊收兵
以圖再舉太祖然之入以語夫人夫人罵曰存信代北
牧羊兒耳安足與計成敗且公嘗笑王行瑜棄邠州走
卒為人擒今乃自為此耶昔公亡奔達靼幾不能自脫
賴天下多故乃得南歸今屢敗之兵散亡無幾一失其
守誰能從公北邊其可至乎太祖大悟乃止夫人無子

性賢不妬忌嘗為太祖言曹氏相當生貴子宜善待之
而曹氏亦自謙退相得甚歡曹氏封晉國夫人後生子
是為莊宗太祖性暴怒多殺人左右無敢言者惟曹氏
從容諫譬往往見聽及莊宗立事曹氏尤謹其救趙破
燕取魏博與梁戰河上十餘歲歲嘗馳歸省母至三四
人皆稱其孝莊宗即位冊尊曹氏為皇太后而以嫡母
劉氏為皇太妃太妃往謝太后太后有慙色太妃曰願
吾兒享國無窮使吾獲沒于地以從先君幸矣復何言

莊宗滅梁入洛使人迎太后歸洛居長壽宮而太妃獨留晉陽同光三年五月太妃薨七月太后崩諡曰貞簡葬坤陵而太妃無諡太妃與太后甚相愛其送太后于洛也涕泣而別歸而思慕遂不起太后聞之欲馳至晉陽視疾及卒又欲自往葬之莊宗泣諫乃止而太后自太妃卒悲哀不飲食逾月亦崩

莊宗神閔敬皇后劉氏魏州成安人莊宗正室曰衛國夫人韓氏次燕國夫人伊氏其次后也初封魏國夫人

后父劉叟黃鬚善醫卜自號劉山人后生五六歲晉王
攻魏裨將袁建豐掠得后納之晉宮曹太后教以吹笙
歌舞既笄甚有邑莊宗見而悅之莊宗已為晉王太后
幸其宮置酒為壽自起歌舞太后歡甚以劉氏賜莊宗
先是莊宗攻梁軍于夾城得符道昭妻侯氏寵冠宮中
謂之夾寨夫人莊宗出兵四方嘗以侯氏從其後劉氏
生子繼笈莊宗以為類己愛之劉氏又多智善迎順意
旨由是寵益專自下魏博戰河上十餘年獨以劉氏從

其父聞劉氏貴詣魏宮上謁莊宗召袁建豐出劉叟示之建豐曰是曩時護劉氏黃鬚丈人也然劉氏方與諸夫人爭寵以門望相高因大怒曰妾父不幸死於亂兵妾去鄉時猶憶環尸慟哭此田舍翁安得至此因命笞劉叟于宮門莊宗即位欲立劉氏為皇后而韓夫人正室也伊夫人位次在劉氏上以故難其事而未發宰相豆盧革樞密使郭崇韜希旨言劉氏當立莊宗大悅同光二年四月冊劉氏為皇后封韓氏淑妃伊氏德妃莊

宗自滅梁志意驕怠宦官伶人亂政后特用事於中自以出賤微踰次得立以為佛力又好聚斂分遣人為商賈至於市肆間薪芻果茹皆稱中宮所賣四方貢獻一上天子一入中宮宮中貨賄山積惟寫佛書饋賂僧尼是時皇太后及皇后交通藩鎮太后稱誥令皇后稱教命兩宮使者旁午於道莊宗有愛姬甚有色而生子后心患之莊宗燕居宮中元行欽侍側莊宗問曰爾新喪婦其復娶乎吾助爾聘后指愛姬請曰帝憐行欽何不

賜之莊宗不得已佯諾之后趣行欽拜謝行欽再拜起
顧愛姬肩輿已出宮矣莊宗不樂稱疾不食者累日同
光三年秋大水兩河民流徙京師賦調不充六軍之士
往往殍踣乃預借明年夏秋租稅百姓號泣於路莊宗
方與后荒於畋遊十二月己卯獵於白沙后率皇子後
宮畢從癸未乃還所至責民供給壞什器徹廬舍而焚
之縣吏畏恐亡竄山谷明年三月客星犯天庫有星流
于天棓占星者言御前當有急兵宜散積聚以禳之宰

相請出庫物給軍莊宗許之后曰吾夫婦得天下雖因武功蓋亦有天命命既在天人如我何因取粧奩及皇幼子滿喜置帝前曰諸侯所貢給賜已盡宮中所有惟此耳請鬻以給軍宰相惶恐而退及趙在禮作亂出兵討魏始出物以賚軍軍士負而詒曰吾妻子已餓死得此何為莊宗東幸汴州至萬勝而還過罌子谷道路隘狹莊宗見從官執兵仗者皆以好言勞之曰適報魏王平蜀得蜀金銀五十萬當悉給爾等對曰陛下與之太

晚得者亦不感恩莊宗泣下因顧內庫使張容哥索袍帶以賜之容哥對曰盡矣軍士抽刀逐之左右救之而免容哥曰皇后惜物不以給軍而歸罪於我事若不測吾身萬段矣乃投水死郭從謙反莊宗中流矢傷甚臥絳霄殿廊下渴欲得飲后令宦者進殮酪不自省視莊宗崩后與李存渥等焚嘉慶殿擁百騎出師子門后於馬上以囊盛金器寶帶欲於太原造寺為尼在道因與存渥姦至太原削髮為尼明宗入立遣人賜后死晉天

福五年追諡曰神閔敬皇后自唐末喪亂后妃之制不備至莊宗時後宮有昭儀昭容昭媛出使御正侍真懿才咸一瑤芳懿德宣一等名號不可勝紀莊宗遇弒後宮皆散走朱守殷入宮選得三十餘人號國夫人夏氏以嘗幸於莊宗守殷不敢留明宗立悉放莊宗時宮人還其家夏氏歸於河陽節度使夏魯奇以同姓也後嫁契丹突厥李贊華贊華性酷毒喜殺人婢妾微過常加剗灼夏氏懼求離婚乃削髮為尼以卒而韓淑妃伊德

妃皆居於太原晉高祖反時為契丹所虜

明宗和武憲皇后曹氏

按五代會要及薛史皆作和昭武顯皇后歐史作憲恐誤

懿皇后夏氏皆不見其世家夏氏無封爵明宗未即位前卒天成元年封楚國夫人曹氏為淑妃追封夏氏晉國夫人長興元年立淑妃為皇后而夏氏所生二子皆已王乃追冊為皇后諡昭懿

宣憲皇后魏氏鎮州平山人也初適平山民王氏生子十歲矣明宗為騎將掠平山得其子母以歸居數年魏

氏卒其子是為潞王從珂明宗時從珂已王乃追封魏氏為魯國夫人廢帝即位追尊為皇太后清泰三年諡曰宣憲

淑妃王氏邠州餅家子也有美色少事梁故將劉鄩為侍兒鄩卒王氏無所歸明宗因安重誨以納之王氏素得鄩金甚多悉以遺明宗左右及諸子婦人人皆為稱譽明宗益愛之而曹淑妃為人簡質常避事由是王氏專寵明宗即位立曹氏為皇后王氏為淑妃妃事后甚

謹每帝晨起盥櫛服御皆妃執事及罷朝帝與后食妃侍食徹乃退未嘗少懈后亦憐之然宮中事皆主於妃明宗病妃與宦者孟漢瓊出納左右遂專用事殺安重誨秦王從容皆與焉劉鄩諸子皆以妃故封拜官爵愍帝即位冊尊皇后為皇太后妃為皇太妃初明宗後宮有生子者命妃母之是為許王從益愍帝以司衣王氏事連太妃心不悅欲遷之至德宮以太后素善妃懼傷其意而止然待之甚薄廢帝立視妃頗厚石敬瑭兵犯

京師太后與廢帝俱自焚死妃與許王從益及其妹匿於鞠院以免晉高祖立妃自請為尼不可乃遷於至德宮晉遷都汴以妃俱東高祖皇后事妃如母出帝即位妃還洛陽契丹入京師趙延壽所尚明宗公主已死耶律德光乃為延壽娶永安公主公主素亦養於妃妃至京師主婚禮尋還洛陽德光北歸蕭翰召立從益漢高祖入乃殺妃語詳從益傳

愍帝孔皇后父循自有傳后有賢行生四子愍帝即位

立為皇后

按五代會要后初封魯國夫人

未及冊命而難作后為廢帝

所弑四子皆見殺晉高祖立追諡曰哀

按五代會要事在天福五年

廢帝皇后劉氏父茂威應州渾元人后為人彊悍廢帝

素憚之初封沛國夫人即位立為皇后弟延皓累官天

雄軍節度使延皓素謹厚及貴而改節以后故用事受

賕掠人園宅在鄴不恤軍士軍士皆怨捧聖都虞候張

令昭以兵逐延皓延皓走相州令昭乃閉城遣其副使

邊仁嗣請已為節度廢帝遣范延光討令昭斬之有司

請以延皓行軍法廢帝以后故但削官爵而已

晉

高祖李皇后

安太妃

出帝馮皇后

高祖皇后李氏唐明宗皇帝女初號永寧公主清泰二年封魏國長公主自廢帝立嘗疑高祖必反三年公主自太原入朝千春節辭歸留之不得廢帝醉語公主曰爾歸何速欲與石郎反邪公主歸以語高祖高祖益不

自安高祖即位公主當為皇后天福二年三月有司請
上皇太妃寶冊太妃者高祖庶母劉氏也高祖以宗廟
未立謙抑未遑七年詔尊太妃為皇太后未奉冊而高
祖崩故后亦訖無冊命出帝立冊尊為皇太后太后為
人彊敏高祖常嚴憚之出帝馮皇后用事太后數訓誡
之帝不從乃及于敗開運四年正月丁亥朔耶律德光
入京師帝與太后肩輿郊迎德光不見館於封禪寺以
兵守之時雨雪寒凍皆苦飢太后乞食於寺僧僧辭陰

祈守者乃稍得食辛卯德光降帝為光祿大夫檢校太尉封負義侯遷於黃龍府德光使人謂太后曰聞重貴不從母教以至此可自便勿與俱行太后曰母不隨子欲何所歸於是太后與馮皇后皇弟重睿皇子延煦延寶等舉族從帝而北所經州縣皆故晉將吏有所供饋不得通路旁父老爭持羊酒獻衛兵不使見帝皆涕泣而去自幽州行十餘日過平州出榆關行砂磧中飢不得食遣宮女從官採木實野蔬而食又行七八日至錦

州遼人迫帝與太后拜安巴堅畫象帝不勝其辱泣而呼曰薛超誤我不令我死又行五六日過海北州至東丹王墓遣延煦拜之又行十餘日渡遼水至渤海國鐵州又行七八日過南海府遂至黃龍府是歲六月契丹國母徙帝太后於懷密州州去黃龍府西北一千五百里行過遼陽二百里而國母為永康王所囚永康王遣帝太后還止遼陽稍供給之明年四月永康王至遼陽帝白衣紗帽與太后皇后詣帳中上謁永康王留與坐

飲酒奏樂帳下伶人從官望見故主皆悲泣不自勝五
月永康王上陞其妻兄禪奴愛帝小女求之帝辭以尚
幼永康王馳一騎取之以賜禪奴八月下陞太后馳至
霸州見永康王求於漢兒城側賜地種牧為生永康王
以太后從行十餘日遣還遼陽明年二月徙帝太后於
建州自遼陽東南行千二百里至建州得地五十餘頃
帝遣從行者耕而食之明年三月太后寢疾無醫藥嘗
仰天泣南望戟手罵杜重威李守貞等曰使死者無知

則已若其有知不赦爾於地下八月疾革謂帝曰我死
焚骨送范陽佛寺毋使我為異地鬼遂卒帝與皇后宮
人皆被髮徒跣扶柩至賜地焚其骨葬焉

安太妃代北人不知其世家為敬儒妻生出帝帝即位
尊為皇太妃妃老而失明從出帝北遷自遼陽走建州
卒於道臨卒謂帝曰當焚我為灰南向颺之庶遺魂得
反中國既卒殯中無草木乃毀奚車焚之載其燼骨至
建州李太后亦卒遂并葬之

出帝皇后馮氏定州人父濛以巧佞為安重誨所喜表
為鄴都副留守高祖留守鄴都得濛權甚乃為重脣娶
濛女重脣早卒后寡居有色出帝悅之高祖崩梓宮方
在殯出帝納以為后以六宮仗衛太常鼓吹導后至西
御莊見於高祖影殿羣臣皆賀帝顧謂馮道等曰皇太
后之命與卿等不任大慶羣臣出帝與皇后酣飲歌舞
過梓宮前酹而告曰皇太后之命與先帝不任大慶左
右皆失笑帝亦自絕倒后既立專內寵兄玉執政內外

用事晉遂以亂隨帝北遷哀帝之辱數求毒藥欲與帝俱飲以死而藥不可得周顯德中有人自契丹亡歸者

言帝與皇后諸子皆無恙後不知其所終

按出帝妃尚有楚國夫人

丁氏乃延煦母見張彥澤傳中史不爲立傳他書亦無可考

漢

高祖李皇后

高祖皇后李氏晉陽人父業農高祖少爲軍卒牧馬晉陽夜入其家劫取之高祖貴封魏國夫人生隱帝開運

四年高祖起兵太原賞軍士帑藏不足充欲敝於民后
諫曰方今起義民未知惠而先奪其財殆非救民之意
也後宮所有請悉出之雖不足士亦不怨高祖改容謝
之即位立為皇后隱帝立冊尊為皇太后帝年少好弄
日與郭允明後贊李業等游戲后數切責之不聽帝與
允明等謀誅大臣議已定入白太后太后曰此大事當
與宰相議之李業從旁對曰先皇帝皆言朝廷大事勿
問書生太后深以為不可帝拂衣而去曰何必謀於閨

門史弘肇等已死周太祖起兵嚮京師慕容彥昭敗於
劉子陂帝欲自出臨兵太后止之曰郭威本吾家人非
危疑何肯至此若按兵詔諭威必有說君臣之際庶幾
尚全帝不從以出遂及於難周太祖入京師舉事皆稱
太后誥請太后臨朝已而太祖出征契丹軍士擁之還
太祖請事太后為母太后誥以太祖監國遂即位遷居
於太平宮上尊號曰昭聖皇太后顯德元年崩

原注隱
帝舊史

實錄皆無皇后帝立二年崩時年二十蓋未嘗立后也
○按陽郊傳帝欲立所幸耿夫人為后郊以為太速夫

人辛帝欲以后禮葬之邠又以為不可則未嘗立后之言信矣耿早卒故不為立傳

周

太祖聖穆柴皇后

楊淑妃

張貴妃

董德妃

世宗貞惠劉皇后

宣懿符皇后

後立符皇后

太祖聖穆皇后柴氏邢州堯山人與太祖同里遂以歸

焉太祖微時喜飲博任俠不拘細行后嘗諫止之太祖

狀貌奇偉后心知其貴人也事之甚謹

按宋史張永德傳柴翁以經義

教里中有女後唐莊宗時備掖庭明宗入洛遣出宮柴翁夫婦往迎之至鴻溝遇雨不能前女取裝具千萬分半與父母全歸曰兒見溝旁郵舍隊長項瞻黑為崔形者極責人也願事之乃周祖也父母大恚然終不能奪他日語周祖君貴不可言妾有緡錢五百萬資君時不可失周祖因其資得為軍司柴翁好獨寢人傳其能司寘間事一日晨起大笑不止妻問之不對翁好飲妻過金盞醉因漏言曰花項漢作天子矣考此事亦見蘇轍龍川別志語近說家故歐文不取及即位后已先卒追冊為皇后諡曰

聖穆

淑妃楊氏鎮州真定人幼以色選入趙王宮事王鎔鎔為張文禮所殺妃流寓民間再嫁里人石光輔光輔死

太祖柴夫人卒聞妃有色而賢遂娶為繼室天福中卒
葬太原太祖即位追冊為淑妃拜妃弟廷璋為右飛龍
使廷璋願以授父弘裕乃拜弘裕金紫光祿大夫真定
少尹太祖葬嵩陵后當陪葬而太原未克世宗詔有司
營嵩陵側為虛墓以俟顯德元年太原開壁被圍乃遷
妃喪而葬之

貴妃張氏鎮州真定人父同芝事趙王王鎔累官檢校
工部尚書鎮州亂莊宗遣符存審以兵討張文禮裨將

武從諫館於妃家見妃尚幼憐之以妃歸太原為其子婦久之武氏子死而太祖楊夫人亦卒遂納妃為繼室累封吳國夫人太祖以兵入京師漢遣劉銖戮其家妃與諸子皆死太祖即位追冊為貴妃

德妃董氏鎮州靈壽人父光嗣趙州昭慶尉妃幼穎悟始能言聞樂聲即知律呂年七歲鎮州亂其家失之為潞州牙將所得潞將妻養以為子憐之過於所生居五六年潞將仕京師遇妃兄瑀欣然歸之時年十三以嫁

里人劉進超歿於契丹妃嬖居洛陽漢高祖自太原入京師太祖從過洛陽聞妃有賢行聘之太祖建國中宮虛位遂冊為德妃廣順三年卒妃兄三人瑀官至太子左贊善大夫玄之自明皆至刺史

世宗貞惠皇后劉氏不知其世家蓋微時所娶也初封彭城縣君世宗從太祖于魏后留京師太祖舉兵漢誅太祖家屬后見殺顯德四年追冊為皇后諡貞惠陵曰惠陵

宣懿皇后符氏祖秦王存審父魏王彥卿后明果有大志初適李守貞子崇訓守貞事漢為河中節度使已挾異志有術者善聽人聲以知吉凶守貞出家人使聽之術者聞后聲驚曰此天下母也守貞益自負於是決反漢遣周太祖討之逾年攻破其城崇訓知不免手自殺其家人次及后后走匿崇訓惶遽遂自殺漢兵入其家后坐堂上顧軍士曰郭公與吾王父有舊汝輩無犯我軍士見之不敢迫太祖聞之謂一女子能使亂兵不敢

犯奇之為加慰勉以歸彥卿后拜太祖為父其母欲使
后為尼不肯曰死生有命天也何必妄毀形髮為世宗
聞而奇之及劉夫人卒遂納為繼室即位冊為皇后世
宗作惡多暴怒後常追悔每怒后必從容伺顏色為解
世宗意亦隨釋由是益重之世宗征淮后切諫不宜親
行不聽師外無功遭大暑雨后以憂成疾而崩葬新鄭
懿陵後立皇后符氏后妹也宋初遷西宮號周太后

欽定續通志卷七十四